



UPA 2015/61
25. marts 2014
Peter Olsen

Inatsisartut aalajangiiffigisassaattut siunnersuut Naalackersuisut peqquneqassasut inuusuttunut timersornikkut piginnaasaqarluartut eqqarsaatigalugit timersornermik ingerlatsinerup saniatigut ilinniakkamik ingerlatsinnaanissaat eqqarsaatigalugu timersornermut højskolemik pilersitsisinnanermut periarfissanik misissueqqullugit.

(Inatsisartuni ilaasortat Siverth K. Heilmann aamma Steen Lyngé, Atassut)

Inatsisartunut ilaasortat Siverth K. Heilmann aamma Steen Lyngé Atassut siunnersuuteqarput; Naalackersuisut peqquneqassasut inuusuttunut timersornikkut piginnaasaqarluartut eqqarsaatigalugit timersornermik ingerlatsinerup saniatigut ilinniakkamik ingerlatsinnaanissaat eqqarsaatigalugu timersornermut højskolemik pilersitsisinnanermut periarfissanik misissueqqullugit.

Qujanaq Siverth K. Heilmann aamma Steen Lyngé Atassut siunnersuutissinnut.

Aallarniutigalugulu Inuit Ataqatigiinniit oqaatigerusupparput assorsuaq nuannaarutigigatsigu uani inatsisartut upernaakkut ataatsimiinneranni timersornermut kulturimullu tunngasunik arlaqartunik oqaluuserisassaqarnerput.

Tassuunakkut ersersinneqarpoq inatsisartunut ilaasortaasugut arlaqartugut timersornermik kulturimullu tunngasunik soqutigisaqarluartuusugut arlaqalersimanerput. Qularnanngilarlu timersortartut aammalu kulturilerisut akornanni inatsisartuniit soqutigineqarnertik assorsuaq nuannaarutigissagaat.

Qilanaarpugut suleqataanissatsinnut suleqatigiilluarnissatsinnullu, neriuppugullu ukioq manna ataatsimiiffiusoq timersornikkut kulturilerinikkullu angusaqarfiulluarumaartoq, suleqatigiiffiulluarumaartorlu. Ukioq manna kulturip timersornerullu ukioriniarunarpaa.

Siverth K. Heilmann aamma Steen Lyngé Atassut siunnersuuteqarnerminni tunngavilersuutaasa pingaarnersaraat inuusuttut timersortartut nunanut allanukaqqaanngikkaluarlutik maani nunatsinni timersuutigalutit ilinniaqqiffigisinnaasaannik periarfissiinissamik ujartuineq pilersitsinissarlu – tassa imaappoq timersornermut højskolimik.

Inuit Ataqatigiinniit oqaatigissavarput siunertaq anguniagarlu paasilluaqqinnaaratsigu tapersorsorluinnaqqissaarlugulu.

Taamaattoq takisuuliorumanata naatsumik oqaatigalugu oqaatigissavarput uunga siunnersuummut tunngatillugu naalackersuisup akissuteqaatigisimasaa aamma soqutiginartilluinnaqqissaaratsigu oqaatigissavarput.

Naalackersuisup akissutimini eqqaammagu massakkut maani Nuummi GUX aamma Nunatsinni Timersortartut kattuffiat suleqatigiillutik pilersaarusoqatigiillutik aallartissimasut maani Nuummi timersuutigaluni GUX-imi atuortoqarsinnaanerata aallartinneqarsinnaanera pillugu.

Taamaattumillu qulaani pineqartut innersuussutigalugit naalakkersuisup inassuteqaatigaa siunnersuut itigartivinngikkaluarlugu kinguartikkallarneqarsinnaasoq, Nuummi GUX-mi misiliinissap aallartissimalereernissaanut; ukiut marluk pingasut qaangiuppata naliliisoqassasoq iluatsinnersoq iluatsinnginnorsorluunniit. Taava taassuma kingorna nalilersuisoqaqqikkumaarluni siunnersuut qaqeqqinneqassanersoq imaluunniit itigartinneqassanersoq.

Taamaattumik Inuit Ataqatigiinniit naalakkersuisup akissuteqaata paasilluarlugu taperserlugulu, matumuuna inassuteqaataa taamatut isikkoqartillugu akuerineqassasoq inassuteqaatigissavarput.